

寒岡集

共
六
十
七

~ 16
2437
16



和
號 2437
志 17-76

寒岡先生年譜卷之三

附錄

祭文

遣禮官致祭文

光海朝

維萬曆四十八年歲次庚申八月丙午朔十六日辛酉
國王遣臣禮曹佐郎李惟一諭祭于卒叅判鄭述之靈惟
靈英才間世孝友出倫弱冠志學遠慕古人尋師求道
不惑他歧精思力踐惟日孜孜謝絕紛華不屑科業上
蔡坊近與叔敦篤確然有立不可撓奪 先后中年旁招
隱逸首膺 召命始離巖穴暫峨豸冠歷典州邑出作



藩垣入司喉舌清白自守一心徇國才無不可所至有
聲走卒兒童孰不知名逮予初服擢為憲長兼輔青宮
冀專教養遭家不造憂畏孔棘仰時上章披露肝膈旋
歸故山講學不輟憲闕丹忱雖老寧弛歲在昭陽又進
封事開曉義理辭意宛轉儒者氣像此焉可見緬彼丘
園水秀山明閑中靜養謂享遐齡那知一夕遽失老成
晚聞凶耗若堂已封追惟往事悲緒纏膏區區賻儀詎
展誠衷茲遣禮官陳此河酌不昧者存庶幾來格

行李光
淵行

遣禮官致祭文

仁祖朝

維天啓三年歲次癸亥六月庚申朔六日乙丑

國王遣臣禮曹正郎金湜 諭祭于卒 贈吏曹判書鄭
述之靈惟靈屹然一世之望既作醇儒寵以二品之官
仍鑿毫旨降茲休命冀乎有知原夫小微降精清洛鍾
液心潛道腴超然無慕乎外脚踏實地卓爾有立乎中
規模繩直而準平際會機鳴而籟應几歛聲猷之發無
非學問所推屬戊申癸丑之年有國家人倫之變兩劄全
息之說直氣寒朗後一人平生辨奸之明先見老泉與
並美純是夷虜之世截然砥柱之功大音難諧同古磬
之沉泗清標誰挹有百梅之滿園世道否泰之相乘以一

身而自任節文詳略之有異輯衆說而折衷言念斯文之衰式至今日而甚道之將廢未盡用其才今也即止不同時有歎典刑邈矣懷想愜如嗚呼紹往開後既有衛道之功致祭加階宜示崇儒之典

弘文館校理李竣行

士林卷文

張顯光

嗚呼哀哉生乎季世而有如先生安可常得其儔匹揆諸夏賢等之古人亦不多讓其履道之貞吉夫道之在宇宙間其理則一地焉有內外時焉有古今理自是無內外無古今如一局如一日故不待文王而興者何嘗地與時之有必雖其造詣成就之業或不能皆至且備

蓋六同為豪傑中之甲乙惟先生早自有見於此理謂聖賢可推而遵適知真儒事業在博學與篤行所從事而孜孜者義理之窮踐履之實士趨失正多由於應科遂捐舉業而志益專壹固惟氣質之秀異豈六無自其學術東賢正學至寒暄而篤實先生為其外裔即餘訓之有隲承正論於頭流所以對立者如柱得磧聞的旨於陶山所以契悟者如入蘭室歸而更求諸六經四子相傳之心法已定之繩墨無非可以自會自律孝悌果為為仁之本推之為百行者誠若根深之木自有枝葉之茂密克養既積磨礪既深坦夷樂易之辭氣藹藹乎

其盈溢人猶畏溫中之厲不猛之威雖被親愛而不敢
狎暱千載絕學至程朱而復明篤信其說擬神明之可
質尤留入於禮學三千三百本末之俱悉我東儒先雖
未嘗不講於禮槩不過乎擬晦庵家禮而略自循率而
先生博考于經傳子集又必參商註疏而括出五禮之
錯綜乎家鄉邦國者固如網舉而目張無不燦然其天
秩通來士子之得知夫冠昏喪祭之不可無儀章度數
持文相講臨事相質者莫非先生之唱帥倘祥林泉道
遙觴詠每在於風花雪月之辰實無非養德之地雅趣
之適而有以宣暢其壅窒召集朋徒攷校書籍不輟於

疾病沉呻之際亦所以薰陶於範圍之中使之開發其
心思防閑其流洩真西山心經一部實為此學防川之
柱指南之車而欠其補註之未盡則遂為之收取先儒
之片言隻句有以發揮乎三十七章之義者無所漏逸
五先生論禮之說得以推明羽翼乎聖人制作之本義
者患其散漫於各書則於是乎類輯篇排會聚於一秩
之中而節文儀則森列畢備是豈尋常之著述此正先
生之真事業雖不得展布於斯世何歟夫此得彼失至
於歷典八邑之小績爵至二品之浮榮自是先生之餘
事外空何足為輕重有無於大業之始卒若夫望君堯

舜隨事盡誠之志確確乎有所不畏於斧鑕惟其汎愛
包容無接不厚之德惻惻乎常情之所不及恤顧惟愚
庸早承養托之義規實並於子姪疾患頽靡縱不得執
經於函丈涵濡滋益之恩何可量以斗斛斤錙嗚呼哀
哉每於拜接之時語必及於不知巖齋之靜謐而曰吾待
得此病少安時節稍平方春流微漲或秋波澄滴即不
煩外客勞此間冠童六七發片舟於琴灘泝洛江而引
縶止繫於不知巖畔坐虛堂而鳴點瑟終必曰此懷之
其果得以遂之耶或示丁寧於札筆今焉已矣永為無
窮之一恨誰從造物者而致詰迫即遠之靈辰奠爵清

與簋飶冀昭明之垂歆情莫盡而言畢嗚呼哀哉

又

鄭經世

天鍾淑氣英粹醇溫篤學好古有本有文爰初弱齡志
在遠大內敦所好寧慕乎外 國重科選士榮釋褐萬
馬雷奔兩脚山嶽杜門求志致禮治躬蹈繩鳴玉右徵
左宮 穆穆先王寤寐英賢遙遙九臯鶴唳聞天東臯
爻爻席珍有價匪我求人入實求我歷職中外令聞四
暢達有所施人不失望 兩朝恩遇一片忠赤責難陳善
老臣心切有告於 前動引堯舜莫如我敬其忠進進
道與時乖心焉有憂奉身而退如潦則休婆娑初服爰

得我直日長山林圖書滿壁優游卒歲貧不改樂末疾
偶嬰謂必勿藥天何不憇德星遽淪儒林厄會正月甲
申遠近同悲愚陋則偏趨隅覲德非角之年丈席雖阻
高山實仰禮起有問丁寧指掌曩忝玉署公在銀臺地
禁職親時獲叨陪 經帷一日同備 顧問 玉音琅
然起及筮遯公時敷對理明辭婉 宸衷默喻僚席心
歎由今繹思愈見親切緬想風采豈可再得屬茲屏伏
歛跡窮山方追咎愆遂斷往還相望幾舍夫豈遠而出
門畏人我生孔悲病不省問歿不奔赴攀輦酌觴亦借
人手此懷之苦不亡者知形留神往哀寓于詞嗚呼哀

哉

又

申湜

伽山鬱第洛水清駛篤生異人實惟間氣英資超邁美
質溫粹爰自志學知有為已絕意科目專精義理功加
慎獨學要近裏尋師取友求道是急德山大谷足靡不
及退陶一曲洙泗真源就而正焉所聞益尊蘭香自聞
鶴書八谷擢置臺端為世矜式晉如摧如確乎其志不
仕無義牛刀屢試召入銀臺嘉乃懋學出按巡闡風化
是責再把南麾惟意卷舒歸來一室左右圖書嗣服初
牟求賢側席起公都憲調護兼托片言驚世狼跋而南

困石撻藜畏譏憂謾朋來自遠非樂伊懼白髮紛如丹
心益苦撻經猷規猶復惓惓十行溫綸足見聖眷新結
茅廬泗水之濱俯仰天地為一閑人奚其為政尚有典
刑何天不慙遽夢兩楹士友肝摧儒林氣索已矣斯文
死灰難復禮書編成宛然手澤門無直卿誰使之續嗚
呼哀哉余以孤陋自知寡與惟公不棄猥見獎許四十
年前辱與之遊向來離合一何悠悠磨肌鳳池肝膽相照
繙經天祿資益不少進退殊途渭對江雲高山景行馳
仰徒動粵在前歲我朝天闕公寄書來為求醫訣知公
此意夫豈徒爾活國醫民道無二致所以古人靈祠禱

止公計至此惟其戚矣白首相思青眼無從兩地襟期
只憑鱗鴻頃有疑問且求齋箴公答公題在道浮沉聞
來懊恨擬再請益何意如今幽明永隔我病經年公計
遽聞心驚膽喪第切哀殞非夫人慟為吾道痛千里緘
辭一觴代奉書不盡言言不盡意英靈不昧其庶鑑此
嗚呼哀哉

又

門下生崔覲

天地之元氣著於四時國家之元氣依乎君子天地之
於萬物生養焉條暢焉成實焉者氣得其和也氣不能
常和而風霜以凋落之水靈以戕鑠之萬物幾乎絕滅而

此氣歸於本根藏乎地中以基生養之根柢焉君子之於時也亦然其得行於世也紀綱立焉政教明焉群材畢舉而庶績成焉不幸而不用於世則頽然遯藏乎山林江湖之間而不與於時事儼然獨處乎濁浪奔流之中而不變其所守修潔其身講學明禮若無關於世道之治亂而亦未嘗不聞焉不言不動不煩誘掖而薰風醉德有不能自覺智者知其方勇者趨其義賢者友其道愚者有所畏而不溺懦者有所恥而不為不肖者有所畏而不敢間有私淑之徒傳習其說以繼後來之倡明焉世道賴以維持而人心不為禽獸者是誰之使然

歟然則是氣也不在朝廷則在乎山林不行於時則行於後世或顯或晦而終不絕滅者非依乎君子者乎昔歐陽公之歿也東坡蘇子以文哭之曰公之生也如大川喬岳不見其運而功利之及物者不可數計而周知公之亡也如窮山大澤龍亡虎逝變怪百出舞鱗鱗而號狐狸嗚呼此歐陽公之氣隨存而存隨死而滅蘇子之所以為公私慟哭者然也今先生之存亡異於是焉有能扶世道而淑人心歿猶習其學而傳其後人紀猶有所植公論猶有所倚譬如日星雖匿而餘光猶燭人得以尋識路徑於幽暗之中而不陷於虎豹狐狸之穴

此先生之氣不待生而存不隨死而亡公私悲慟之中猶有所慰幸焉爾先生學問之精粗造詣之田地非膏學後生所能摹像而槩以一生用力之勤持守之固而著見於動作言語之間者則溫然而春風襲藹然而德容睟斐然而文理到斯豈非好學好禮有德有言之君子耶况乎以豪邁之氣而折之以禮義以俊逸之才而韜之以敦朴慕高義於桐江尋道脉於雲谷講而求之好而樂之不知衰白終老之相侵先生之所得不既多於人乎故其見諸事業者撫字百里則民樂絃歌之化獻替九重則乃嘉啓沃之忠專制方面而公黜陟之

典持憲霜臺而明用法之當以至瀝血抗章優容以堯舜之道解組歸田爭致其考問之禮雖不久於朝不卒其施而安危之重表率之望恒存乎一身畢竟優游閑靜之地逍遙湖泗之上無愠無悶自樂羲皇之歲月則天之所以享先生者亦不可謂不多也惟余小子散德慕義蓋有年矣而搢衣承教未得其依幸而田沒顛躓之餘得返於草澤之中天借五六載之閑使得磬折於泗上之門屏一至再至三至而不厭屢承謦欬之音時聞鑄誨之語向之歆敬慕悅之誠庶遂其親炙之願而不幸先生違疾沉綿良藥莫效然而所恃者神氣克然

酬酢如常日與諸子講禮不輟意者神明或為斯世斯
文而有可扶護也那知侍講之筆未續而均天之詔忽
降不念斯民之無祿而厭世而長逝乎嗚呼七十八年
非不壽也而共悲山探之推百卷謨言非不盛矣而莫
保回祿之餘士林之痛庸有極乎尚幸心經有解禮說
已成授受之微言從此可尋眾說之異同從此可定先
生雖歿而道則未亡國家之元氣終有所託而起我後
學其不在茲乎嗚呼去歲十月告辭而返三盃餞別尚
歎不滿今歲之春哭送靈輜拜備一觴莫見其嘗嗚呼
哀哉宇宙茫茫

又

門人黃宗海等

吾道之東自我箕子禮樂文物號稱小華羅而洎麗豈
無豪傑學能為己曠世無聞烏川唱先四賢緇踵猶未
大闡有待其人天生退溪大成斯集束脩諸彥輝映光
塵惟我先生克紹世嫡天資渾厚稟質純剛霽月襟懷
和風氣像早自惕厲不屑科程晚落頽波汗馬心地芻
豢性理觴礪典墳積歲磋磨弗得弗措美壻著錄體驗
收功顏勿四非曾唯一貫躬行敬義膺服明誠表裡交
修知行互進酬酢萬變聖賢楷模出處行藏惟義之比
毀譽欣戚一我靈臺側席 先朝羽儀丹陛難進易退

龍德奚為逮事嗣王陳少堯舜納君無過斷斷其忠身
危道窮操履彌篤自反而縮群議何傷素位而行不知
不愠非欲獨善惟道殉身爰卜幽貞于彼散地山連雲
谷水是泗洙四壁圖書一心向道精思力踐造詣益深
衛道閑先擴其未發因才脯後叩其兩端先生之心關
閩瀛洛先生之德北斗泰山宜享期頤以壽道脉玄胡
不淑夢奠兩楹宗海等買積小儒雕蟲末學久仰德範
無路及門歲在執徐德照湖分始月張繹獲拜伊川互
鄉得師潮人向學統閱數稔言返南鄉及夫戊申再駐
軒蓋雖愧立雪咸喜坐春前後樞衣古今問禮叨陪繕

寫作為成書親炙既多飽德亦久慳慳小子孰不自新
至其禮儀曲垂錫誨委巷受賜奉先罔愆自此周旋庶
不失墜一隅函丈十二星霜曾不相忘鼎鼎書札環顧
不敏撫躬銜息其在晚年縱嬰二豎神明所相不至沉
綿德容猶前道體無改南望相賀謂幸斯文天不憖遺
遽爾大病著龜已失有疑何稽梁木既摧學子安放道
學之正行誼之高已矣難追卷中前哲天喪之慟殄瘁
之悲血氣所同非假私哭日月流邁窀穸有期生榮死
哀奔走多士夫子之葬越人猶觀矧伊吾徒敢闕執引
道途脩迫不克齊趨千里哀誠一人是托奠雖菲薄情

在荒詞不昧者存冥賜昭假

又

門人李厚慶

聖學既遠大道晦塞競尚葩藻爭馳利欲淳風日弊人
鮮踐迹不有英傑其何奮發猗歎先生間世挺出資本
高明量又闕廓粹若精金温如良王志學之初徃從德
溪詞華燦爛思徒推躋幽蘭避棘獨鶴超雞殿棄舉業
脫洒世習年未踰冠厲志道學衆方驚異自信益篤淵
源深遠來自寒暄不顯其光遺韻尚存樞衣退陶心學
斯質切問近思求道益密執贄山海景仰壁立承訓惺
惺學如不及知見益廣刻勵傳習敬義明誠交修致力

動靜不懈表裡相飭魯鄒的韻洛閩嘉說寤寐興言恍
若對越潛心實體毋怠毋忽乾乾惕若始終如一德盛
心下道尊禮恭貌莊體胖志定神冲仁孝忠信可質神
明子諒豈第見乎至誠超然高蹈展也大成玉韞山輝
聲聞于天徵辟雖勤辭謝愈堅絲綸鼎來睿眷彌切一
起登對威顏咫尺天德之要王道之原義利之分師弟
之深酬酢如響敷奏丁寧至尊虛受百僚聳聽把符楠
外懇懇輸忠正笏立朝謇謇匪躬設施言論一出誠懇
兩朝顯擢寵榮殊渥難進易退君子之志安我素履富
貴雲視行藏以道去就惟義歸來故園寓意山水婆娑

檜洲棲遲武此主管烟雲恣賞梅竹勝日前川冠童後
先風花雪月幽趣無邊萬物靜觀境與天通四時佳興
樂與人同優游忘老爰得我直晚卜琴湖泗水之澳堂
扁景晦齋揭持敬欽斯承斯動遵先正明窓絕塵淨几
薰爐深衣幅巾左書右圖聖賢風範言仁有錄發揮心
經編緝禮說推闡啓鑰以惠來學倡明扶植道脉昭晰
儒林仰止泰山喬嶽身處江湖心懸紫極瀝血封章屢
叫閭闔危言雖凜聖恩猶優夷險一節進退均憂嗚呼
哀哉一疾沉痾六載將息爰歿莫效瞑眩無益去歲之
秋試浴椒温獲侍再月就養晨昏神觀雖勞志氣則彊

冠襟必整應接循常謂膺眉壽遠至耄期寧料一夕天
不慙遺寢疾繞聞哀音遽至百里奔赴襲歛已施憑尸
失聲徹泉哀淚山頽柔懷小子安放教缺言湮後學疇
仰慶也無狀已卯趨隅叩竭兩端誘掖昏愚開示八德
如視諸掌清晝講論疊疊敦獎中夜喚醒眷眷清響温
恭遜順弘大寬廣八介字訓實我藥石樂育不倦夫子
懇惻服勤無隱小生分職欲報之德東海莫測每荷諄
諄許以連牆中心耿耿恭倚何忘有志莫就終天憾憾
萬事已矣無路卒業長號莫及孰知我悲日月迅速即
遠告期風烟慘色山浦哀思敬祖陳辭千古永訣明靈

不昧庶歆涸酌

又

門人李潤雨

惟我東方僻在海隅箕疇世遠道學荒蕪園隱有作命
世真儒誰的其傳寒暄是承潛心小學進退規繩一辨
香傳實惟先生蘭茁其芽才豪氣英爰自髫髻岐嶷夙
成粹如精金溫如良玉資稟既異充養有得早從德遠
憤排求學學以為已戢棄舉業精思力踐朝夕對越執
贄陶山大道始聞吟弄以歸其樂欣欣聞風山海東脩
是將高山景行千仞鳳凰所聞益高所見益親乾乾夕
惕日新又新知行兩進動靜交養篤實輝光而睥背益

一時儕輩欽衽推先忠信篤敬倚衡參前子諒孝悌鬼
神可質秋月冰壺清通洒落珠歲澤媚聲聞上騰弓旋
鼎來恩詔有徵不仕無義幡然一起延英登對陳說義
理至尊傾聽具僚聳驚百里分憂四境又平一戴勇冠
千官肅清出奠藩邦留詠甘棠入掌絲綸思日贊襄當
予初年首加延訪春宮之輔烏府之長正色立朝朝野
想望進難退易歸意莫遏角巾東門匹馬行色邨山之
下虎溪之邊三逕就荒一室蕭然富貴浮雲家食是安
雲山烟月欣我考槃我簞我瓢或採或漁優哉游哉其
樂只且江湖憂國一飯不忘刻肝瀝血幾封危章謗言

盈車聖息彌乾晚卜葺修于泗之陽草屋寥寂左圖右
書研窮道妙日居月諸發揮心經編輯禮說提綱挈要
指南來學暮春三月春服既成花外小車于彼郊坰川
流始達草木向榮萬物靜觀一團和氣忘老軒中景晦
堂裡深衣大帶幅巾方履德並年高令聞不已一感風
痺六載牀蓐醫窮技殫藥石無益温井椒泉幾勞沈沐
天不慙遺遽啓手足士林齊悲賢愚共惜識與不識莫
不慟哭鳥獸草木皆懷惻惻小子無狀早業科程失脚
塵途虛過半生晚登門墻叨承撝掖不謂慳慳開示烟
福春堂晝靜秋齋夜空論說從容疊疊不窮人倫之正

王道之中出入古今治亂興亡義利邪正進退行藏靡
不講究盡入思量誨誘諄諄明白剴切雖甚昏愚亦知
警發我官于北過薛蘆谷開酒送我辭意懇至臨別慙
懃所勗惟義我滯龍城五經寒暑翩翩書札款款誨語
我來自北公已在病筋力雖萎氣血猶盛容貌必莊衣
帶必整夜雖呻吟晝對書冊編書講禮終始不輟接人
論學敬勤如一將期百年以卒其業鬼惡天高胡寧忍
此孰解余惑孰發余志過將誰砭疑將誰問呼天不聞
有淚空墮嗚呼奈何已矣已矣卜鄰舍傍夙願已墜築
室壇場素計難酬一觴長慟天地悠悠靈其不昧其知

也不

又

門人金鑿

西原鄭氏東國顯閥代有偉人世纓組紱積德之應維
岳降神篤生夫子絕類離倫曾無君子斯焉取斯緬惟
寒暄百世之師倡明道學扶植倫彞猗歟先生是為外
裔有的其緒式克善繼天資近道兒戲禮容氣宇精粹
水月襟胸早脫科臼志于正學尚友千古圖書一室俯
讀仰思心法鄒魯忠信為本敬義為主行先孝悌動惟
規矩涵濬本源刻厲堅苦依仁據德學已深造進進不
息就正有道兩賢一時冥翁退老負笈陶山正脉是接

樞衣山海高風是挹講磨切磋淵源有自真知真得脚
踏實地道德積躬在邦必達幽蘭空谷馨香自發聲聞
九重東帛爻爻禮羅豹隱榮溢鷓班延英晉接遇主無
咎不仕無義出而佩綬歷試諸城絃誦洋洋生祠頌碑
亦有輝煌宣化關東遺詠甘棠擢入銀臺司其喉舌出
納惟允咸賀稱職位亞秋官無寬於獄憲長烏府不法
者戢著遇之恩前後曰篤展盡所學朝野共望君子大
節唯在行箴進固義也退亦義焉去就失宜烏得為賢
先生出處義之與此時乎可去銀章敝屣某水某丘依
舊物色歡迎僮僕怨收猿鶴一簞一瓢樂而忘飢身遠

江湖目擊時危愛君憂國食舊愈切遇遯封章雖無補
益肝血攸瀝聞者膽慄士氣以壯史冊增貢舉世齊馨
誰識其貴誠忠鯁直萬古無擬退與吾徒難起答問不
倦不屑教誨無隱望門負牆飲河充腹久矣吾師辰也
先覺好古之道屏開太極慕古之制深衣野服誠深衛
道志專纂述平生事業固多乎哉斯文不幸回祿為災
補經二部擴前未發撰禮七篇輯諸儒說實裨世教寶
重家國惜乎晚年嘲詆益恣事修諷興德高毀至昔有
賢聖莫容皆是不容何病然後君子金鍊方精玉焚知
栗自外至者何與於已難謀者天未曉者理何物二豎

為崇六禩莫護道體德薰滂俗神明不佑吾道之厄小
微光晦木稼已實周夢告凶秦春遽撤士慟靡依邦增
殄瘁彼蒼者天胡莫憇遺龍亡大澤鱗鱗晝舞虎逝深
山狐狸夜號嗚呼已矣九原難作金聲玉色於何更接
霄月光風於何更襲事君以忠無復以得與人以恭無
復以覲修德者誰樂道者誰好學無之講禮無之巖壑
之妥今何仰止廊廟之器今何望止雲鎖武屹波咽泗
水岡上松楸葉葉含惻園中梅竹枝枝撼撼人之所悲
物亦皆愁小子空空半世悠悠自余鼓篋誘掖雖誠朽
木難雕呼寐莫醒一字之恩天地無窮緣我不敏志氣

昏夢受業無成碌碌庸庸但自所期無負始終惡聲之
至思報捐躬貧病相纏奉陪希濶承穎承教每後朋列常懷
忝然自歎無狀豈意今日永失依向尤有痛者亦非一
二始聞愆候未即趨侍既不扶病又闕嘗藥歿不飯含
歛不憑哭李路請禱我未能及桓榮奔喪我亦多愧追
隨諸子顏厚忸怩念及于此肝摧身哀我心之悲曷有
其極祖真在前遠通咸萃恭陳菲薄文以代贄不昧者
存庶鑑誠意

又

後學柳於

天有奎壁公稟其精地有河嶽公鍾其英清標玉潔馨

德蘭薰早自得師立雪溪門動靜有養表裡交修學博
而正理微必求進德之誠至老彌篤衛道之功昔賢同
烈進位於朝國倚著龜忠言嘉謨植倫扶彛退講于家
為世儒宗秉義明禮啓發昏蒙斯文未喪正脉在是小
人所畏君子攸恃孰謂一疾遽促大期吾道益孤我慟
非私嗚呼哀哉窮通一夢芳穢千年歿而不朽惟聖與
賢先生忠義昭揭宇宙先生事業仰若山斗瞻彼湖泗
維水泱泱淵源有自永流東方嗚呼哀哉昔我先君生
並一世聲應氣求道合心契逮余小子又獲考德一違
鳳儀屢換萱葉山川悠邈疾病纏綿縱闕負笈實切慕

羶云胡不淑而有今日歿不舉棺病未啓足奔赴後人
死有餘責單衣薦度有淚盈襟惟靈不昧庶賜鑒臨

又

清安儒生迺忠秀等

麟絕魯郊鳳寂周岡長夜不晝德星無光迄于衰叔孰
啓昏蒙猗歟先生實我儒宗早有惕厲長益篤實加川
遺訓陶山正脉孝悌先務學文餘力參乎三省回也四
勿研從物上搜自源頭知行互進表裡交脩爬梳肯綮
鑽仰高堅提挈綱領理會魚鳧爲蘭不掩香玉未韜輝在
昔先后有喜同時誠深授室望以輔台枳棘屢棲去采
琴鶴觀風一節識貊舊域俄膺宸管叅正義畫發揮文

象考證傳義仕學俱優允矣君子遭逢聖明擢拜風憲
力排群議獨持正論唐朝一鳳宋殿孤鶻蜀日見怪齊
曝無益竿瑟異好枘鑿難合一作冥鴻永辭鷄助志安
素履身返初服瞻彼泗陽獨樂其園仁山壽壽智水源
源持敬名齋執禮雅言條分節文推演儀則編為一部
述而不作西河設教湖學遺法啓排孜孜擊蒙拳拳負
艾自遠列屨滿千士知所趨人樂為善曰我清澹道之
云遠鄉無矜式學類墻面魚行不早燕說何補擬進舉
比一辨帝虎薰德未及易簣何忙士悲山頽國悼鑑亡
庭草決翠座上春寂仇有血氣尚知匍匐矧我縫掖孰

後奔哭於何考德小子無述慟係斯文哭非吾私襄奉
已經悲慕曷追遠具時著恭進哀辭鑑茲微誠庶幾格
思

川谷書院從祀時告

程朱二先生文

張顯光

重明大道長夜復日絀開偉業前後揆一光被海外仰
若兩曜既列諸賢庶享文廟地名興思別崇院學川焉
谷焉宛想遺躅如就門庭如承几席從以鄉儒亦有成
式夷夏同天道豈今昔近有鄭公早自私淑存心遠大
律已繩墨尋究淵源知有準的本院建設多公規畫宗
尚正學表章奧義可擬升堂何殊丈侍事宜躋從人無

異議茲卜吉辰告以即事

告先生文

斯文寔幸公出吾鄉生有異稟妙齡知方絕意世累脫
身時趨學須正學儒必真儒身東心夏生晚慕古動思
繩墨事求規矩排人笑侮堅自豎立不挫不撓日乾時
習寒暄的訓退陶正脉親切服膺就正心得謂宋諸賢
實續墜緒取讀遺書誦詠嚼咀求端用力指掌提掖蓋
於二子不啻親炙周經直方魯論博約一心從事終始
無射道本孝悌德主忠信講明禮學必遵必慎聿考經
傳究厥本末以身以家餘範傍遠冠昏喪祭人見古儀

遠通承風爭相質超有陳于君堯舜之道或施於民化
洽幼老歸處閑中留意著述發揮心經詳備學術會通
禮說五論歸一允所修明皆縉絕筆惟此事業實祖伊
洛尚德報功禮合崇尊并從兩賢連我寒暄源派緒業
互彰交輝後學承事永有依歸

擗淵書院奉安文

惟我先生學承先賢道合隆尚士論同然奉繼寒暄躋
享川谷淵源有自準範來學鄉復共議吾黨親炙餘教
在耳曷時有忘遺澤存身思切羹牆特地伸誠別廟香
火情所罔已義無不可相此擗淵曾是高築地通岡原

望雲齋額春兩秋霜孝省攸跡繞嶂臨流百梅脩竹於
以畜德於以講義盤桓得意遵養樂志何立何石有非
留馥顧瞻舊園猶存手植立祠致虔事理允恰不龜不
筮咸曰其地公私集力堂宇既備頃值邦旣舉禮不暇
茲焉寇退兵馬既卸趁辰消吉正位妥靈溪山依古敞
新階庭豈但今日如侍門屏後學百世知有軌式敢用
茲芬德容宛接敬伸陳告庶幾降格

春秋享祀祝文

維某年某月某日干支院生姓某敢昭告于先師文穆
公寒岡鄭先生伏以禮教躬先正學心專餘範在邦享

儀無愆茲值仲春秋謹以清酌翰音采盛庶品用申常薦
尚饗

寒岡先生年譜卷之三終

